

Ekwo

Mayika

Onye Mpfuchiru Chileke

1 ¹ Ọwaa bụ ozi, Chipfu ziru Mayika; onye shi lẹ mkpụkpu Moreshetu; teke Jiótamu bụ eze ndu Jiuda; yele teke Éhazu bụ eze, ndu Jiuda kwaphọ; wakwaphọ teke Hezekáya bụ eze, lẹ Jiuda ono. Ọ kwa ọphulenyá, ọ phuru l'opfu ẹhu ndu mkpụkpu Samériya yee ndu mkpụkpu Jierúsalemụ.

² Unube ndiphe;
unu nụmakwa-o!
Ge mgboko l'opfu ngabekwa
nchi;
mekpoo onyemonye,
bu iya nụ!
Ge Nnajiuphu, bụ Chipfu
gbekwa l'eze-ulo iya,
du nsọ gbaa unu
ekebe.

**Ikpe, eekpe ndu Samériya
yee ndu Jierúsalemụ**

³ Sụ-a; lekwa! Chipfu shikwa
l'eka o bu ebubu abya.
Oo-bya bya azọ garamu
garamu l'eli-úbvú
l'eli-úbvú, nọgbaa l'eliphe.
⁴ Úbvú úbvú ono a-zashihu
lẹ mkpula ọkpa iya;
nsuda nsuda

agbawashihuchaa
 agbawashihu
 g'ùnwù, e doberu lẹ
 mgboru oku; gẹ mini,
 shi lẹ mgbaze asoshihu.

⁵Iphe-miphe-a bukota iphe, kparu iya nu bu atupya, oshilokpa Jiekopu tupyaru Chileke; mbu iphe-eji, ndu onu-ulo Izurelu meru. ?Bu onye be uta duru le Jiekopu tupyaru Chileke? ?Tobudu ndu mkpukpu Sameriya? ?Bu onye be uta duru le ndu Jiuda meru iphe-eji? ?Tobudu ndu mkpukpu Jierusalemu? ⁶“Noo g'o gude mu je emee mkpukpu Sameriya ikpozú; eka aa-nodu akoje opfu-vayinu. Mkpuma igbulo iya be mu a-chiru ye le nsuda ono. Mu emee g'okpa-ulo iya zekposhihu gheru onu. ⁷Iphe, bu ntekpe, ndu Sameriya doberu be ee-tsu yogiri yogiri. Iphe-miphe, aapfuje phe l'ulo nshi be ee-tsukota oku. Temu mu abya emebyishikota iphe-miphe, o kpuru akpukpu dobe agwa agwagwa. Noo kele iphe ono, onoduje anako ono bukota l'eka o shi bu l'ugwo, aapfuje unwanyi-ukpara. O bukwarupho gaakpakaje ugwo, aapfuje unwanyi-ukpara bu g'aa-kpaka iya.”

Ara ekwa; waa agu aphu

⁸Oo iphe ono meru g'o gude mu je ara ekwa chia mkpu. Mu a-gbaru okpa oto; gbaru ehú oto. Mu a-kwa phuuphuu ge nkuta-oswa. Mu arakwapho aphu-aphu ge mgbashi-ujiku; ⁹kele onya, aba mkpukpu Sameriya taa ladu alala; teme o baswewaru ndu Jiuda. O jerwuakwaru onu-abata, e shi ejepfu ndibe mu; mbu jerwuchaa Jierusalemu lonwiya.

¹⁰Unu te epfukwaru iya ndu mkpukpu Gatu! Ophu unu arakwa ekwa arara ophu! Unube ndu mkpukpu Betu-Ofura; unu gwo-phua onwunu lurwuku! ¹¹Unube ndu bu le mkpukpu Shafiya; Unu gbaru oto gude iphere je iphe, unu eje! Ndu ophu bu le mkpukpu Zananu taa futakwa afuta. Ndu mkpukpu Betu-Ezelu be aphu tsokwaru; noo kele iphe, shi gbobuta phe nu be a nafuakwaru. ¹²Mbu le meji atofukwa ndu bu le mkpukpu Marotu atofu eka ephe no ele enya iphe, du ree; kele ejo-iphe shiakwa Chipfu l'eka byarwuta onu-abata mkpukpu Jierusalemu. ¹³Unube ndu bu le mkpukpu Lakishi; unu kwakobe ugbo-inya unu k'ogu! O kwa unube-dua vuru uzo gbube ishi iphe-eji; ndu nwada Zayonu tsoahaa eka unu; kele atupya, ndu Izurelu tupyaru mu bu ngu be o shi l'eka. ¹⁴Oo ya bu g'i kwaru ivu-ulo nu ndu mkpukpu Moreshetu-Gatu. Ndu mkpukpu Akuzibu l'e-me ndu eze ndu Izurelu mkpurukpuru-nya.

¹⁵Mu a-chita ndu a-bya emekpee unube ndu bu le mkpukpu Maresha. Ndu Izurelu ndu ophu aakwabeje ubvu a-gbaru laa l'ogba Adulamu je ewohaa onwophe. ¹⁶Unu kpushia ishi; ghebe ishi onu; nodu l'aphu unwe-girima ono, du unu l'obu ono! Unu mee ishi g'o chaa unu swarishwari ge k'uudele; kele ee-mechaa naa phe unu kpua phe le ndzu.

Iphe, Chileke abya ememe; yee ophu nemadzū abya ememe

2 ¹Aphū a-tsokwaru ndu ono, achī idzu iphe, adūdu ree; mbū ndu anōduje l'iphe-azēe phe arī k'eme ejo-ememe. Nchi -bōhuepho; ephe awata iya ememe; kele ike, ephe e-gude eme iya dū phe l'ēka. ²Ephe achabeje ɛnya l'alī onye ozo; naa ya l'okpehu. Teke ephe chaberu ɛnya l'ulo; ephe anakwaa ya pho l'ehuka. Ephe nōdu anatajē nemadzū unuphu ibe iya; mbū naa obutobu phe iphe, bū okiphe iya.

³Noo g'o gude Chipfu sū: “Lenu; mu achīru ndu ono idzu ejo-iphe. Ophu ephe a-dūdu ike anahū ejo-iphe ono agbala. Unu te ejehēkwa etse etsetse kele teke ono a-dū ejo eji. ⁴Lē mbōku ono bē ndiphe a-nōdu eme unu iphe-ochi. Ephe emee unu kwaphukwaphu aguru unu ebvu-aphū-a:

“E mebyishikōtaakwaru anyi
 rengurengu.
 Okiphe ndibe mu bē e woru
 kee.
 Chipfu natarū mu iya l'ēka!
 O woru alī anyi nūchaa ndu
 amadū iya nū.”

Ndu mpfuchiru, epfu iphe, Chileke epfuduru

⁵Oo ya bū l'unu te enweēdu mē onye lanū, a-nō-chi ɛnya unu lē ndzuko kē Chipfu; onye a-tū ido gude kee alī ono.

⁶Ndu mpfuchiru phe asuje: “Unu ta asujeshi l'ō Chileke pfuru ūdu iphe ono, unu epfu ono. O tō dukpoda iphe-iphere, byaru eme anyi.”
⁷Sū-a; gūbe onu-ulo Jiékōpu; ?!aa-sū lē Unme Chipfu bē ēhu egħu egħu tōo? ?Oomeje egube iphe ono tōo? Opfu mu ?too mejeduru onye ūzo iya pfuru nhamūnha iphe, dū ree tōo?

⁸O gbē buru gē mbōku abvūwaa abvūbvū bē ndibe mu wū-lihuru būru ndu ohogu mu. Unu yefuchaa phe akpawuru-uwe ndu eze, ephe yeru; mbū ndu tuzoshihuru ēhu aghatakpooro gē ndu shi ogu alwa. ⁹Unu achīfujē unwanyī ndibe mu g'ephe te ebuhe l'eguru ibe phe. Unu anajē unwu phe iphe, bū iphe, dū ree, shi mu l'ēka. ¹⁰Unu gbalihu tūgbua lufu; kele ēka-a ta abūdu okpoku unu; kele e merwuwaru iya emerwū. E mebyishiwaru iya; k'ophu e tee mekwatabaēdu iya.

¹¹O -buru l'ō dūru onye tsoru aghaphe epfu mkpōkoro opfu adzūshi ūka eye iya sū lē Chileke sūru g'a nguje mē-mini yēe mēe mbekee ngu-shi iya ike; noo egube ndu epfu iphe, dū unu ree anūma bū onoya!

Ekwe nwandu wafuru nū ukwe ndzōta

¹²“O tō dukwa iphe, e-me gē mu ta atūko g'unu ha chīkobe; unubē oshi-lōka Jiékōpu! O tō dukwa iphe, e-me gē mu ta achīkobe unubē nwandu

wafuru nū l'onu-ulo Ízurelu l'eka lanu! Mu a-chikota phe g'ephe nokobe l'eka lanu g'onye chiru aturu ye l'ulo aturu; g'onye doberu egbu yee aturu l'eka o no ata nri. Epehe e-ji eka ono pyimu pyimu atu wowooowo kele epehe a-pa igwerigwe. ¹³Onye e-gbuharu phe uzo osa l'a-buru onye e-vuturu phe uzo. Epehe e-chikaa onu-abata mkpukpu ono wughata wufu. Onye eze phe evuru phe uzo ghataada. Mbū l'oo Chipfu a-buru phe ivuzo.”

Mba aabaru ndu-ishi epehe le ndu mpfuchiru

3 ¹Noo ya bu; mu su: “Unu ngabe nchi; unube ndu bu ndu-ishi oshilokpa Jiékopu; mbū unube ndu bu ndu-ishi l'onu-ulo Ízurelu. ?Togbaduru g'unu a-maru g'ekpeje ikpe, pfuru oto to? ²Mbū unube ndu kporu iphe, du ree ashī; bya eyee ejo-ememe obu; ndu anoduje aswa ndibe mu akpo; bya akpa phe anu l'okpu; ³unube ndu ata anu ndibe mu; bya aswa phe akpo; bya etsu okpu phe yogiri yogiri; ndu ebushije anu phe seesee ganu, aabya eye l'ochi; mbū ganu aabya ade l'ite?”

⁴E -mechaa; epehe araku Chipfu; ole o too yeduru phe onu. Teke ono be oo-woharu phe iphu iya. O buru iphe, a-kpa iya nu bu l'ephe mewaru ejo-ememe.

⁵Wakwa iphe, Chipfu epfu baa: “A -bya l'opfu ehu ke ndu mpfuchiru Chileke, bu ndu ono, edusweshi ndibe mu ono; mbū ndu abujeru: onye nuru phe nri; epehe agoru ehu-guu nu iya. Teke o dudu iphe, a nuru phe; epehe akwakobe etso onye obu ugu. ⁶Noo g'o gude nchi je l'ejipfu unu. Ophulanya anahu unu; ochii erikpute unu. Ike agba eja taa duedu unu. Mbū lenyanwu a-nyihuru ndu mpfuchiru ono. Echi-eswe aburu phe tsukiribaa. ⁷Ndu aphuje ophulanya be iphere e-mechaa du. Ndu agba eja aburu ndu e kpuru iphu le nu. G'ephe ha e-mechaa tuko kpuchia eka l'iphu kele Chileke te eyejeeduru phe onu.”

⁸Obenu le mbedua be ike jikporu mu ehu pyimu pyimu. Unme ke Chipfu jiru mu ehu; yee ekpe ikpe, pfuru oto; yee ike-okpu, mu e-gude karu oshilokpa Jiékopu emeswe, o mesweru; mbū karu oshilokpa Ízurelu iphe-aji phe. ⁹Unu numakwa iphe-a; unube ndu-ishi onu-ulo Jiékopu; mbū unube ndu bu onyibe l'onu-ulo Ízurelu; ndu-ikpe, pfuru oto du ashī; teme epehe nodu emeje iphe, pfuru oto l'o gbee nggo; ¹⁰ndu gude egbu ochi gude kpa mkpukpu, no l'eli ubvu Zayonu; mbū gude eme ejo-iphe kpa mkpukpu Jierusalemu. ¹¹Ndu-ishi phe bu a -nada phe iphe-uphalazu teme epehe ekpee ikpe. Ndu-ishi-uke phe nodu ezije iphe me a -pfuada phe ugwo; teme ndu mpfuchiru phe nodu agbaje eja me a -nada phe okpoga. Ole epehe tukokwaru-a dakobe Chipfu epfu su: “Chipfu nokwa l'echilabo anyi; ophu o dukwa ejo-iphe, byaru adapfuta anyi.”

¹²Oo ya bu l'oo unu kparu iphe, ee-mechaa koo ubvu Zayonu kofu g'akoje opfu-a. Mkpukpu Jierusalemu e-mechaa buru ikpozu. Eli ubvu ono, bu eka eze-ulo Chileke du ono; e-mechaa buru eka egbudu zechiru.

Èhu-guu ojejoje
(Azá 2:2-4)

- 4** ¹Su-a; o -rwua teke ikpazu
 be ee-me g'eli úbvú ono,
 a kpuru eze-ulo Chileke
 ono nguru anguru;
 mee ya l'ò buru iya
 a-kachaa shii l'iphe,
 bukpuo úbvú ozo
 noḡbaa nu.
 Mbù l'ee-me iya g'ò kakota
 úbvú ozo l'eli.
 Noo teke ndiphe a-nodu
 awu awu-pfu iya.
- ² Ikpoto oha a-bya bya asu:
 “Unu bya g'anyi je l'eli
 úbvú ke Chipfu!
 Unu g'anyi je l'ulo ke
 Chileke ke Jiékopu.
 Oo ya e-zì anyi uzo iya;
 k'ophu anyi a-wata
 etso uzo, o toru.”
 Noo kele ekemu e-shi l'úbvú
 Zayonu futa;
 mbù l'opfu Chipfu e-shi le
 mkpukpu Jierúsalem.
- ³ Oo ya e-doshi opfu,
 dugbaaru ikpoto
 nemadzu.
 L'ò bya edoshiaru oha,
 ike dugbaa, bugbaa
 uzenya uzenya opfu,
 duru phe nu.
 Ephe e-woru ogu-echi
 phe
 kpukwaa l'ò buru ogu;
 woru arwa phe kpu
 l'ò buru mma nshii,
 e gude akocha iphe.
 O to duedu oha,
 a-patakwalu ogu-echi

ejepfu ọhozo ọgu;
 ọphu ẹphe anwuedu
 alwu ọgu ọzobaa.

4 Onyemonye a-nọduje
 ẹ mkpula vayinu nkiya;
 mękwapho ẹ mkpula oshi
 figu nkiya;
 ọphu ọ dudu onye byaru
 eye phe ebvu;
 kele ọ kwa Chipfu,
 bu Ọkalibe-Kakota-Ike
 eepfu iya.

5 Ọhamoha ozo g'ẹphe ha a-nọdukwaro ejegbaa l'ọbvụ; agwa nshi phe; obenu l'anyịbedua bu onye anyi e-gude ẹpha iya eje bu Chipfu, bu Chile-ke anyi jasụ l'ojejoje.

Iphe, Chipfu chiru k'ememe

6 Wakwa iphe, Chipfu epfu baa: “O -rwua mbọku ono be mu a-chi-kobe ndu ẹniyeni; mu achikobe ndu a chifuru l'alị phe; yee ndu mu meru; ẹphe je iphe-ẹhuka. 7 Ndu ẹniyeni be mu e-me g'ẹphe buru ndu waru nu. Mu emee ndu a chifuru l'alị phe g'ẹphe buru ọha, ike du. Ọ buru Chipfu a-buru eze phe l'eli úbvú Zayonu e -shi mbọku ono jasụ l'ojejoje.

8 “A -bya ẹ gube nwada Zayonu, bu ẹka a no eche ndu Ízurelu g'onye eche aturu-a; bya aburu ẹka ndu Ízurelu agbabaje je ezeeru ndzu; ii-mechaa buru ishi gi shi buru teke ndiche; mbu l'aburu eze e-mechaa rwubebaa gube nwada Jierusalemu ọzobaa. 9? Bu gunu kparu iphe, jira ẹkwa? ?Ti nwehedu onye eze to? Onye akpo-ziru ngu uto; ?o lawaru l'iswi to? mbukwanu meru g'o gude iphe-ẹhuka gudeshia ngu ge nwanyi, ime eme. 10 Gube nwada Zayonu; nodunu chi gburugburu ge nwanyi, ime eme; kele nta-a be jibyakwa aha oma mkpukpu-a je akwaa l'oma ẹgu. Ii-je ali ndu Babilonu. Ọ buru ẹka ono be aa-nafuta ngu. Ọo l'eka ono be Chipfu a-gbata ngu l'eka ndu ohogu ngu. 11 Nta-a be ikpoto ọha, du igwerigwe chikoberu onwophe bya etsoo ngu ọgu. Ẹphe nodu epfu su: ‘G'a turwua ya! G'anyi chiru ẹnya yeru Zayonu!’ 12 Obenu l'ẹphe ta amadu iphe, bu oriri Chipfu. Iphe, o chiru idzu k'ememe te edoduru phe ẹnya; mbu onye ono, chikoberu phe g'onye chikoberu balị eje echichi ono.

13 “Gbalihu chia balị; gube nwada Zayonu; kele mu e-me gi fua mpu-igwè. Ichirupfu-okpa ngu aburu onyirubvu. Li zo ikpoto ọha tolitoli. Li woru urwu ono, ẹphe ritaru l'eregede ono woru ye Chipfu l'eka; mbu woru ẹku phe ono nu Nnajiuphu ono, nwe mgboko l'ophu.”

**Ukwe k'onye e-shi lẹ Bẹtulehemu
bya aburu Ishi**

5 ¹“Sụ-a; unu chikobe onwunu nọo l'ophere l'ophere; unube mkpukpu ono, ikpoto nemadzu nọo ono; kele ndu ohogu unu nọ-pheakwaru unu anọ-phe. Onye-ishi Ízurelu bẹ ephe e-chikwa mgboro l'asha kẹ kpoo.

²“Obenu lẹ gubedua, bụ Bẹtulehemu, nọ l'onu-egu Ifurata; mbukpokwaa g'i bụ nwa mkpukpu, ha nwanshii l'ime mkpukpu nọ l'ipfu Jiuda l'ophu-a; bukwa l'ime ngu bẹ onye a-buru ishi ndu Ízurelu l'ophu e-mechaa shi futaru mu; mbu onye shiro teke ndiche noduhawaa; onye shi ledenwede noduta ndzu.

³“Oo ya bụ lẹ ndu Ízurelu bẹ aa-gwobe gbiriri jasụ teke nwanyi ono, ime eme ono lezedu; teme unwunna iya ndu ophuu alwapfutafua ndu Ízurelu. ⁴Onye ono la-pfukporu buru onye eche aturu chee aturu iya ono. O buru Chipfu a-nu iya ike; bya aburu Chipfu, bụ Chileke iya e-me g'a kwabe iya ubvu. Ephe ebukporu; o to dudu iphe, eme phe nu kele teke ono bẹ idu iya e-jedzuru mgboko l'ophu. ⁵O buru iya e-me ge nchi a-duru phe doo.”

Ndzota yele Ola-liswi

“Teke ndu Asiriya l'a-bya awuba l'ali anyi; zohaa garamugaramu azopyashi eka anyi kpuru kpushia ya ike bẹ anyi a-hota ndu eche aturu umadzu esaa yee ndu bụ ndu-ishi umadzu esato gephe duta anyi tsoo ndu Asiriya ogo. ⁶Ephe e-gude ogu-echi lwua ali ndu Asiriya ono; mbu l'ephe a-mi-lita ogu-echi phe gude lwua ali Nimurodu. O buru iya a-nafuta anyi l'eka ndu Asiriya; m'ephe -byaepho bya awuba l'ali anyi wata azo garamugaramu awu ala l'oke ali anyi ono.

⁷“Oshilokpa Jiekopu ndu ophu waru nu l'a-nodu l'echilabo ohamoha du g'iji, shi l'eka Chipfu akwa. Ephe a-du ge mini, lwaru yegeyege dugbaa dzedzedze l'eli eswa, bu ophu abudu nemadzu bẹ o nọ ele enya iya; ophu o dudu onye o nọ ngaberu. ⁸Oshilokpa Jiekopu ndu ophu waru nu l'a-nodu l'echilabo ndu-ohozo buru oduma, nọ l'echilabo anu-egbudu; mbu l'ephe a-du ge nwa oduma, ephe l'aturu gharu eghirigha, abujeru o -nodu eje l'oolajashi iphe, o guderu; ophu o dudu onye aduje ike dzoo iphe, dabaru iya l'eka. ⁹Ndu ohogu ngu bẹ ii-mekpekota; l'i chi-lia eka imeli tua okoo. Ozo bu lẹ ndu gu l'ephe duru l'opfu bẹ ee-mebyishikota.”

¹⁰Wakwa iphe, Chipfu epfu baa: “O -rwua mboku ono bẹ mu e-gbushi inya unu bya aku-pyashia ugbo-inya unu. ¹¹Mu e-mebyishi mkpukpu, dugbaa l'ali unu bya etsukposhia ulo-mgbobuta unu g'o ha. ¹²Mu e-mebyishi k'eme mgbashi ono, unu eme ono; ophu ndu jibya aduedu l'echilabo unu. ¹³Mu e-mebyishi ntekepe ono, unu pyishiru agwa agwagwa ono; bya emebyishikwapho mkpuma mkpuma ono, unu agwa agwagwa, dugbaa

l'echilabọ unu ono; ọp̄hu unu ephozebaeduru iphe, unu gude ẹka unu mee ọzobaa. ¹⁴Mu abya alwua nshi Ashera ono, nọ l'echilabọ unu ono; woru mkpukpu unu l'ophu tsukposhia. ¹⁵Mu egude oke ẹhu-eghu mu melata ọhamoha ono, jikaru l'ephe tee medu iphe, mu sọru g'ephe meje ono.”

Eeku Ndu Ízurelu Ikpe

6 ¹Unu ngabekwa nchi l'olu Chipfu. Gẹ gube Chipfu gbeshi pfuru apfuru pfua iphe, e meru ngu l'iphu eze úbvú! G'úbvú úbvú nımawaro iphe, oome g'o pfua! ²Unube úbvú úbvú; unu nımakwa iphe, Chipfu abya edodo! Unu ngabẹ nchi nıma iphe, ada nı; unube itso, gude mgboko jasuru asuru! Noo kele ọ duru iphe, Chipfu epfu lẹ ndibe iya meru iya; mbu l'ọ duru iphe, ọogushi lẹ ndu Ízurelu meru iya.

Ọnu, Chipfu eye

³“Sụ-a; ndibe mu; ?Bunaa gunu be mu meru unu? ?Bu ivu-erwa gunu be unu a-sụ lẹ mu boru unu? Unu sanaa mu iya! ⁴Mu dufuwaru unu l'alì Ijiputu; bya agbafuta unu l'alì ono, unu shi nọdu buru ohu ono. Mu zia Mosisu sụ g'ọ bya edua unu; yefua Eronu; yee Miriyamu. ⁵Unube ndibe mu; unu nyatakwa idzu, ọ chiru; mbu eze ndu Mówabu, bu Belaku! Unu anyatakwapọ ọnu, Belamu yeru; mbu nwa Beyo! Unu nyatakwa ije, unu jeru e -shi lẹ mkpukpu Shitimu jasụ lẹ mkpukpu Gilugalu; k'ophu unu a-maru iphe, Chipfu meru gude dzota unu!”

⁶?Bu gunu be mu e-gude bya l'iphu Chipfu; mbu bya ephozeru Chileke ono, parụ ẹka apaa ono? ?Bu anụ be mu e-wota bya l'atatiphu iya gẹ mu gude iya gweeru iya ngweja-akpo-oku; mbu nweswi mgbapha? ⁷?Oo-du Chipfu ree mẹ a -nụ iya unu-kuru-unu ebili; nụ iya nggele manụ, aso gbo-rogoro unubuku ugbo iri? ?Mu e-wota okpara mu gude gwaa Chileke gwefu atupya, mu tupyaru iya to; mbu gẹ mu woru nwa, shi mu l'ehu pfua ugwo iphe-ẹji mu?

⁸O goshiakwaru gube nemadzu iphe, du ree k'ememe. ?Bukwanu gunu bu iphe, Chipfu ele enya iya l'eka ngu, abudu gi meje umere, pfuru oto; li yee enya l'aphu obu-imemini; li woze onwongu ali; etso Chileke ngu.

Ikpe, nmaru ndu Ízurelu yee iphe, ee-me phe

⁹Unu ngabekwa nchi! Ọ kwa Chipfu eku ndu bu lẹ mkpukpu oku; teme atsụ gube Chipfu ebvu bukwanuru mmamiphe. “Unu nımakwa iphe echachi ada; yee olu onye echi iya nụ! ¹⁰Unube ndu ejo-iphe; ?bu gẹ mu zohaa ẹku ono, unu kparụ l'uzo eregede ono to; yee nwamkpirikpu nkweka bu iphe, Chileke turu onu? ¹¹?Mu kpefu onye gude iphe, aatuje iphe l'uzo eregede ere aswa; mbu onye vu ẹda, erwa iphe, nọ iya nụ abudu iphe, ọ sọru l'ọ bu? ¹²Ndu nweru iphe, bu lẹ mkpukpu ono emeje ndu

ozo mkpawere. Ndu bu iya nu bu ndu ntuphu-ire; teme ephe nodu egudeje ire phe epfu opfu l'eregede. ¹³Noo g'o gude mu watawaa emebyishi gube mkpukpu ono; mbu eme ge mu gwepyaan ngu; kele iimeje iphe-eji. ¹⁴Nri be ii-rikwa; ole ephe tee jidu ngu. I -richaa ephe egheleru ngu-anu. I -kpachaa eku dobe; o to dudu ophu adu nu; kele ophu i doberu g'o phodu be bu ogu-echi be ee-gude l'wua ya. ¹⁵Ii-koebekpoo iphe l'ali; ole i tii kpatadu iya. Akpuru oshi olivu be ii-zoshikwa; ole i tii nyidu manu iya. Ii-pyishikwapho akpuru-vayinu; ole i tii ngudu mee ya. ¹⁶Kele unu mewaru iphe, Omuri suru g'unu meje; bya emekota iphemiphe, ndibe Ehabu anoduje eme; teme unu byakwapho etsoru omelali phe. Noo g'o gude mu je l'aha gube mkpukpu ono g'i buru ochobu; bya emee ndu bu ngu nu gephe buru ndu aachi ochi. O buru unu be ndiphe a-nodu ata uta."

Aphu ndu Izurelu

7 ¹O kwa aphu tsoru mu; kele mu du g'onye egu agu le teke a wochaarun akpuru oshi lonanwu; bya awochakwapho akpuru vayinu. Ophu o duedu tiyotiyo akpuru vayinu ono, dukwadu nu, aa-wota ria eriri. Ophu o dukwapho akpuru, dukwadu l'oshi figu, bu ophu agushikpoo mu ike. ²Su-a; ndu yeru Chileke obu laakwaru l'iswi l'eliphe-a. Mbu l'o to duedu g'o ka mma l'oo onye lanu, bu onye obu iya guru iphoro, phoduru nu. Onyemonye buephe iphe, o kwageberu akwagebe iya bu gegburu ochi. Onyenonu gude ugbe-egege ege ge ya nmata nwune iya. ³Eka phe ebo ebo be eme ejo-iphe kwowaru ehu. Ndu bu onyibe me ndu-ikpe ekebeje g'a nu iphe-uphalazu. Ndu bu o-kari-eka nodu anataje iphe, guru phe nu lokpehu. Gephe ha nodu anoduje achi idzu lanu. ⁴Onye gbe kachakpoo ree l'ime phe adzu g'obvu. Onye ophu kachaa abu onye obu iya guru iphoro ka ikpo ogara-mbo eji.

Eswe mboku ono, ndu nche unu shi pfuta opfu iya ono ruwakwaru; mbu mboku, Chileke a-nu unu aphu. O kwa nta-a bu teke aa-tu unu eberete. ⁵Unu ta adakobekwa nemadzu ibe unu! Ophu unu achijekwaru upfu ye l'onye unu l'iya eshi onya! Mbukponu nwanyi ono, ze tu-kobe ngu ishi ono; makwaru udu opfu, iipfu eyeru iya! ⁶Noo kele nwa ta akwabejedu nna, nwuru iya nu ubvu. Nwa nwanyi nodu etsoje ne iya opfu. Nwa nwanyi, aalu alulu nodu etsoje ne ji iya opfu. Mbu le ndu bu ogu duru nemadzu bu ndu ephe l'iya bu l'unuphu.

⁷Obenu le mbedua a-nodunupho ele enya Chipfu. Mu a-kwaberu Chileke, bu Onye ndzota mu. Mbu le Chileke mu a-numa-a olu mu.

Ndu Izurelu a-gbeshia ozo

⁸Unube ndu ohogu mu; unu te etekwa eswa kpua mu! A makwaru-a le mu daru iko; ole mu a-gbalihukwaa ozo. A makwaru-a le mu no l'ochii;

obenu l'ọo Chipfu a-buru ìphóró, duru mu nu. ⁹Eshinu mu meru Chipfu iphe-eji be mu e-vutanu oke ehu-eghu iya vuru; gbiriri jasụ teke ọo-bya elee enya l'opfu ehu mu; meeru mu iphe, rwuberu mu nu. Lọ bya edufuta mu dobe l'eka ìphóró dọ. Mu ahuma g'oo-gude dzota mu. ¹⁰Noo teke ohogu mu ono a-humakwa iya pho. L'o woru eka kpube l'iphu l'eka iphere e-gude iya. Mu egude enya mu huma eka oda kpurumu kpurumu; mbu onye ono, shi asuje mu: “?Denu Chipfu, bu Chileke ngu?” O to dudu g'aan-beru l'a zo yebedua tolitoli g'onye azoka epuchi oma gbororo.

¹¹Eswe mboku, aa-kpukwa igbulọ ngu ono abyaakwaa. Mbu mboku, ee-me g'oke ali ngu kporiberu. ¹²O -rwua mboku ono be ndibe ngu eshijechaa Asiriya abyapfuta ngu; mekpoo ndu e-shi l'iphe, bu mkpukpu, no l'ali Ijiputu; mbukpoo e-shi l'ali Ijiputu jasụ l'enyimu Yufurétisu; eshi leze-enyimu owa-a jasụ l'ozo; eshi l'ubvu owa-a jasụ l'ubvu ozo. ¹³Eliphe l'ophu aburu ochobu; o buru ndu bu iya nu a-kpa iya; kele ephe a-ghota akpuru-iphe, ephe eme.

Epfu anu Chileke aja iya ajaja

¹⁴Gudenu oshi-eree ngu chee ndibe ngu g'onye eche aturu; mbu ndu ono, bu okiphe ngu ono, bu ndu ophu bu nwekiniy phẹ l'ime oswa; l'ali, zeru eswa nri eghe yee aturu ono. G'ephe nodunu l'ali Beshanu yele ali Giladu je ataa nri g'o shi duhawaa teke ndiche ono.

¹⁵“O kwa egube iphe, du biribiri, mu meru goshi teke ono, unu shi le Ijiputu futa ono bu ge mu e-me iya goshi phẹ nta-a!” ¹⁶Ohamoha a-huma iya; iphere egude phẹ. L'a nashichaa phẹ ike phẹ l'ophu. Ephe eworu eka dee l'onu. Nchi echihu phẹ; ephe awata ada nkuchi. ¹⁷Ephe egude ire richaahaa urwuku g'agwo; mbu g'unwu iphe, awu l'epho. Ephe eshigbaa l'eka ephe kpuru futa aphugbaa ke kwekweekwee. Ephe egude ndzu-agugu ghakobechaa byapfutashia Chipfu, bu Chileke anyi. Ephe awata unu atsụ ebvu.

¹⁸?Bu onye dubaa ge gube Chileke, bu onye aguje nvu l'iphe-eji; teme i nodu eleghataje emeswe, nwa ndu ono, phoduru nu ono, mesweru ngu; mbu ndu ono buhukwapho okiphe ngu ono? Ehu te eghujedu ngu eghe jasụ l'ojejeje. Obenu l'iphe, aduje ngu ree bu g'i phua obu-imemini. ¹⁹Iiphuru-a anyi obu-imemini ozo. Iphe-eji anyi be ii-mechaa zopyashia l'okpa. Mbu woru ejo-ememe, anyi emekota vuru je echie leze-enyimu. ²⁰Lii-meru oshilokpa Jiekopu ire-lanu; mbu phuru oshilokpa Ebirihamu obu-imemini, bu iya bu angu, i riru nna anyi oche phẹ teke ndiche ono.